

Na osnovu člana 201. stav 1. tač. 29. i 207. stav 1. tačka 22. i stav 2. Ustava Republike Bosne i Hercegovine - Prečišćeni tekst ("Službeni list RBiH", broj 5/93) i čl. 113. i 157. Poslovnika Skupštine Republike Bosne i Hercegovine, na zajedničkom zasjedanju Skupštine održanom 11. maja 1993. godine u Sarajevu, Zenici i Bihaću usvajajući Odluku o prihvatanju dokumenata Vens-Ovenovog mirovnog plana za Bosnu i Hercegovinu, donosi

ZAKLJUČKE

O PROVOĐENJU DOKUMENATA VENS-OVENOVOG MIROVNOG PLANA ZA BOSNU I HERCEGOVINU

I

Skupština Republike Bosne i Hercegovine snažno izražavajući i čvrsto stojeći na pozicijama mira prihvatila je Odlukom dokumente Vens-Ovenovog mirovnog plana za Bosnu i Hercegovinu, uvažavajući pri tome volju građana Bosne i Hercegovine o mirnom i zajedničkom životu svih njenih građana i naroda u demokratskoj, nezavisnoj i suverenoj Republici Bosni i Hercegovini koja je izražena na republičkom referendumu od 29. februara i 1. marta 1992. godine. Republika Bosna i Hercegovina je odlučna da se dokumenti Vens-Ovenovog mirovnog plana za Bosnu i Hercegovinu provedu dosljedno, efikasno i u utvrđenim rokovima.

Skupština Republike Bosne i Hercegovine, kao najviši organ vlasti u Republici Bosni i Hercegovini ističe da je zaustavljanje agresije na Republiku Bosnu i Hercegovinu, očuvanje njene nezavisnosti, samostalnosti i teritorijalnog integriteta i cjelokupnosti, kao i zaustavljanje stradanja njenog stanovništva i razaranja materijalnih dobara prevashodan zadatak državnih organa i građana Republike Bosne i Hercegovine, kao i obaveza organa i tijela Ujedinjenih nacija i najšire međunarodne zajednice da zaštite od agresije Republiku Bosnu i Hercegovinu kao međunarodno priznatu državu i članicu Organizacije ujedinjenih nacija.

II

1. Skupština Republike Bosne i Hercegovine traži od organa Organizacije ujedinjenih nacija i najšire međunarodne zajednice da hitno i efikasno pristupe sprovođenju svih dokumenata Vens-Ovenovog mirovnog plana za Bosnu i Hercegovinu, posebno Sporazuma o miru u Bosni i Hercegovini.

Skupština naročito zahtijeva od Organizacije ujedinjenih nacija da se do kraja i dosljedno provedu sve rezolucije koje je Savjet bezbjednosti Ujedinjenih nacija usvojio u sprečavanju agresije na Republiku Bosnu i Hercegovinu.

Skupština ističe da je dosadašnje nesprovođenje rezolucija Savjeta bezbjednosti Ujedinjenih nacija u velikoj mjeri doprinijelo nastavku agresije praćene najtežim zločinima i genocidom. Neodlučan i neefikasn odnos međunarodne zajednice doveo je do katastrofalnih posljedica u Republici Bosni i Hercegovini čijih je više od 200.000 građana poginulo i nestalo, još više ranjeno i preko 2 miliona raseljenih i izbjeglih lica.

2. Skupština Republike Bosne i Hercegovine ukazuje Organizaciji ujedinjenih nacija i najširoj međunarodnoj zajednici da odlučno i efikasno provedu Vens-Ovenov mirovni plan za Bosnu i Hercegovinu i da svim raspoloživim sredstvima, uključujući i vojnu intervenciju i ukidanje embarga na uvoz oružja u Bosnu i Hercegovinu zaustave agresiju na Republiku Bosnu i Hercegovinu.

III

Skupština Republike Bosne i Hercegovine zadužuje Predsjedništvo Republike Bosne i Hercegovine, Vladu Republike Bosne i Hercegovine i druge državne organe u Republici da, u skladu sa svojim pravima i obavezama, odmah preduzmu aktivnosti i donesu potrebne mjere u provođenju dokumenata Vens-Ovenovog plana o Bosni i Hercegovini. Skupština posebno ističe da se u prelaznom periodu, do donošenja novog ustava Republike Bosne i Hercegovine i narednih parlamentarnih demokratskih izbora moraju maksimalno uvažavati kontinuitet legalnih organa vlasti i dostignuti stepen parlamentarnog i demokratskog života u Bosni i Hercegovini, u skladu sa Ustavom Republike Bosne i Hercegovine i dokumentima Vens-Ovenovog mirovnog plana o Bosni i Hercegovini.

O programima, inicijativama poslanika i aktivnostima na realizaciji ovih dokumenata i zaključaka Skupštine Republike Bosne i Hercegovine sa ovog zasjedanja, zaduženi državni organi podnosiće redovno izvještaje Skupštini Republike Bosne i Hercegovine.

IV

Ove zaključke objaviti u "Službenom listu RBiH", sredstvima javnog informisanja i dostaviti Savjetu bezbjednosti organizacije Ujedinjenih nacija i Evropskom parlamentu.

S. broj 169 11. maja 1993. godine Sarajevo

Predsjednik Skupštine RBiH, **Miro Lazović**, s. r.